

CHARAKTERE DER DARSTELLER	
01 Filli	pfiffig, hat Detektivgespür
02 Kira	mutig
03 Lucy	etwas schwer von Begriff
04 Hexe Rucola	böse, hat nur das Übelste im Sinn
05 Rotkäppchen	lieb, weiss aber, was sie will
06 Wolf	ausnahmsweise mal auf der Seite von Rotkäppchen, und erst noch ein Angsthase
07 12. Fee Dornröschen	hilfsbereit
08 Aschenputtel	ein bisschen zickig und dauerhungrig
09 Prinz (zu Aschenputtel)	dienstfertig, aber etwas vergesslich
10 das tapfere Schneiderlein	immer in seine Arbeit vertieft
11 Zwerg (von den 7 Zwergen)	verfressen
12 Zwerg	verfressen
13 Zwerg	verfressen
14 Hans im Glück	ziemlich grossspurig, aber ohne Glück
ANGABEN LINKS / RECHTS: - Bühnenbild: vom Zuschauer aus gesehen - kursiv geschriebene Spielanweisungen: vom Schauspieler aus gesehen	

1. BILD	Filli, Kira und Lucy vor dem Haus / im Wald		
LICHT	hell, ganze Bühne		
BÜHNENBILD	links Haus, an der Hausecke eine Birke mit Bänkli, auf der Bühne Wald (Bäume als Elemente oder Vorhang),		
PERSONEN	01 Filli		08 Aschenputtel
	02 Kira		09 Prinz
	03 Lucy		10 tapf. Schneid
	04 Hexe Rucola		11 Zwerg 1
	05 Rotkäppchen		12 Zwerg 2
	06 Wolf		13 Zwerg 3
	07 12. Fee		12 Hans im Gl.

SZENE 1

Musik

(Vorhang öffnet sich; Filli sitzt auf dem Bänkli und macht Hausaufgaben, steht auf, überlegt, rechnet; nach einiger Zeit erscheinen von rechts Kira und Lucy)

KIRA Hey Filli!
(Filli guckt, Lucy winkt hallo)
Was machsch?

FILLI Hey Kira, Lucy! Oh, guet das ihr chömed. Mir isch nämlich jetzt grad sooo langwillig worde.

LUCY Bi was?

FILLI *(zeigt die Aufgaben)*
Bi dem.

LUCY Ah so, bi dä Rechnige. Alles klar. Die han i scho gmacht.

FILLI Umso besser. Wie vill git denn 28+34?

LUCY Äh... wart...äh...72!

FILLI Guet, danke!
(schreibt es ins Heft)
Und 16+18?

LUCY Filli... mues das jetzt sii? Du häsch doch grad gseit, das seg langwillig!

KIRA Und usserdem sind mir zum spiele do ane choo.

FILLI Okay! Dä Rescht mach i denn irgendwann!
(legt Heft und Stift aufs Bänkli)

KIRA Haha, aber am beschte scho no hütt, suscht hätt denn d’Frau Haberkern kei Freud a dir.

FILLI Jojo... d’Frau Haberkern... aber was machemer jetzt?

KIRA Gömmer ine und mached üs en Vanille-Pudding?

FILLI Ou lieber nöd. Das hätt letscht mol sone Sauerei geh. Und wo s’Mami heichoo isch, han ich alles elei dörfe ufputze.

KIRA Stimmt... aber dä Pudding isch trotzdem guet gsii!

LUCY Spieled mir doch Versteckis!

KIRA Ou jo!

LUCY Bis wo ane gilts?

KIRA Eifach ums Huus ume.

FILLI Isch guet! Kira suecht üs!

KIRA Okay! 1...2...3...4...5...6...7...8...9...10! Ich chume!
(Filli hinter die Birke, Lucy rechts hinters Haus)

Musik

(Kira hält Ausschau, es geht 2-3 Mal ums Haus; dann erwischt Kira zuerst Filli, dann Lucy)

KIRA Haha, beidi verwütscht! Ihr händ halt eui lang Nase z'wiit füreg'streckt.
 FILLI *(fasst sich an die Nase)*
 Die isch aber gar nöd eso lang.
 LUCY Das isch ziemlich schnell gsii, Kira. Do chunnsch scho fascht dä Weltmeischer-Titel defür über. Aber wart nur, bis ich denn draa bin!
 FILLI Und wer isch jetzt?
 KIRA D'Lucy dank! Die will jo Weltmeischerin werde!
 LUCY Isch guet, verschwinded! Ich zell uf zäh.
 FILLI Aber langsam!
 LUCY Jojo... 1...2...3...4...5...6...7...8...9...10! Ich chume!
(Filli und Kira beide rechts hinter das Haus)

Musik

(Lucy öffnet die Augen, schaut sich um und sucht zuerst links beim Baum. Sie findet niemanden. Da taucht von rechts die Hexe Rucola auf. Sie schiebt und zieht eine Schatztruhe durch den Wald. Lucy beobachtet ungläubig und geht einen Schritt näher. Da entdeckt sie die Hexe. Lucy erschrickt. Die Hexe verzaubert Lucy. Diese sinkt auf das Bänkli. Die Hexe guckt sich nochmals um und schiebt dann die Truhe weiter. Sie wird im Hintergrund unsichtbar hinter Bäumen deponiert. Hexe Abgang links)

FILLI *(taucht nach einiger Zeit mit Filli wieder auf)*
 Hey Lucy!
 KIRA Haha! Häsch üs nöd g'funde!
 FILLI Nanu? Wiit und breit kei Lucy. Die isch wohrschiinlich ganz lätz ume glaufe!
 KIRA Mir händ üs eifach zu guet versteckt!
 FILLI Sölle mer die Ärmscht go sueche?
 KIRA Isch glaub besser. Suscht verlauft sie sich no i üsem grosse gföhrliche Wald und begegnet am Schluss no anere Hex!
 FILLI Haha! Genau, und die verzauberet sie denn.
 KIRA *(beginnen zu suchen; zuerst Richtung Publikum, dann Richtung Baum)*
 Lucy! Luucy!
 FILLI Hallo, wo bisch, Lucy? Chasch ufhöre sueche!
 KIRA *(beide entdecken Lucy gleichzeitig auf dem Bänkli)*
 Lucy!
 FILLI Jo... aber... was isch denn mit ihre?
 KIRA *(stupst sie an)*
 Lucy, so säg doch öppis!
 FILLI *(horcht an Lucy)*
 Also schnuufe tuet sie.
 KIRA Aber sie seit nüüt und sie bewegt sich nöd!
 FILLI Das isch doch... mir chunnt das eso vor, als wär sie verzauberet worde!
 KIRA Ach quatsch, das isch doch gar nöd möglich. Es git doch gar kei Zauberer. Die git's höchstens im Märli.
 FILLI Weiss ich doch au. Aber es gseht trotzdem so us. Oder häsch du öppe en Idee, was das chönnt sii?
 KIRA Jo denk irgend sonen plötzliche Aafall oder so öppis.
 FILLI Glaub ich nöd.
 KIRA Doch doch, das mues eso sii.
 FILLI Isch jo jetzt auch gliich. Mir müend sie verstecke!
 KIRA Wieso denn das?
 FILLI Will s'Mami gseit hätt, ich müesi zerscht d'Ufzgi mache, bevor ich mit eu spiele dörf. Und du weisch jo, dass ich d'Ufzgi nonig fertig han. No nöd emol d'Hälfti! Will suscht chumm ich Husarrescht über.

KIRA Wie blöd!
FILLI Chumm, ich han en Idee!

SZENE 2

Musik

(beide ab ins Haus; als sie weg sind, tauchen von rechts Rotkäppchen und der Wolf auf; sehen Lucy nicht)

ROTKÄPPCH Los, los!
WOLF Ich has dir im Märliand scho gseit. I dä Menschwelt fürchtets mich. Wölf händ no nie gueti Erfahriga gmacht mit dä Mensche.

ROTKÄPPCH Jetzt bis nöd sonen Schisshaas!
WOLF Du bisch guet! Ich ha jo gar nöd wele mitcho mit dir.
ROTKÄPPCH I dä Märliwelt häscht mi schliesslich au zum Fresse gern.
WOLF Das isch öppis ganz anders.
ROTKÄPPCH Du bisch jo au do en Wolf, oder?
WOLF Aber ich dörf do niemer fresse, suscht gits grad wieder en Skandal.
ROTKÄPPCH Wolf! Mir müend do bi dä Mensche irgend öpper finde, wo üs hilft. Do goht's nöd ums Fresse!
(in diesem Moment kommen Filli und Kira mit einer Decke aus dem Haus; Rotkäppchen und der Wolf verstecken sich hinter einem Baum und beobachten)

FILLI Das goht sicher.
KIRA Hm... meinsch?
(legen Decke über Lucy; beide betrachten sie)

FILLI Meinsch dass me da merkt, dass do öpper drunder isch?
KIRA Ich würd's glaub merke.
FILLI *(legt Lucy seitlich ab auf die Bank)*
Und jetzt? Isch da besser?
KIRA Also ich weiss nöd... dini Muetter isch jo nöd doof, oder?
FILLI Hm...
(beide stehen ratlos da; Rotkäppchen kommt hervor, der Wolf etwas dahinter; Kinder erschrecken)

FILLI Ouhh! Nöd verzaubere, bitte...
KIRA ...oder fresse!
ROTKÄPPCH Ach was, ich cha doch gar nöd zaubere!
FILLI Aber...aber... ihr zwei gsehnd jo fascht so us wie... wie...
ROTKÄPPCH Mir sind's!
FILLI S'Rotchäppli und dä böse Wolf?
KIRA Hä! Wie goht denn das?
ROTKÄPPCH Losed guet: I dä Märliwelt herrscht Ufregig! D'Hex Rucola hätt dä gross Märlikristall us em Märliand g'stohle und isch demit zu dä Mensche g'flüchtet.

FILLI Was isch mit dem Kristall?
WOLF *(räuspert sich)*
Ohni dä Kristall verlüered d'Märli ihren magische Glanz und verblashed meh und meh. Bis sie schliesslich für immer us em Gedächtnis vo dä Mensche verschwunde sind. Und denn verschwinded au mir.

KIRA Ah, jetzt chum i druus.
ROTKÄPPCH Aber säged emol, ihr zwei, wer verstecked ihr denn eigentlich under dere Decki?

KIRA Gsehsch, ich has jo gseit, da merkt me, wemme nöd grad doof isch.
FILLI *(nimmt die Decke weg und richtet Lucy auf)*
Das isch d'Lucy, üsi Fründin. Mir händ Versteckis g'spielt, und plötzlich isch die so gsii. Seit nüüt meh und tuet nüüt meh.